

Nus essan «made in China»


Tge ha da far il Chalandamarz cun ina fiera da peschs?

DA DAVID TRUTTMANN/FMR

Questa fin d'emna è vegnì annullà il Chalandamarz en il Grischun. E la culpa è probablmain ina fiera da peschs e fritgs da mar en ina metropola chinaisa. Quai tuna extremamain absurd ed abstrus. Però atgnamain è quai pli che normal. Pertge? – Cumenzain cun l'istorgia a la fin:

Oz en la pausa da café po segir mintgin da nus raquintar da sias experientschas da la fin d'emna: dal Chalandamarz annullà, dal savun per dischinfectar ch'è vendì or en stizun, dals rapports en gassetta e televisiun. Mintgin ha fatg sgnoccas quests davos dis sur da la panica e l'isteria. Mintgin ha ditg ch'i saja ussa propi in pau exagerà cun questas mesiras preventivas cumandadas da las autoritads.

Però mintgin da nus ha era fatg auters patratgs ed autras dumondas: Èsi ussa tuttina da prender serius ils avvertiments? Èsi perfin dad avair tema? Co èsi uss exact da lavar ils mauns? Avant u suenter gentar? Avessan nus a chassa, en il cas serius, propi avunda reservas da panzetta, pulenta e pelatis? E gea, nus tuttas e tuts avain legì, tadlà u guardà quests dis rapports davart il virus da Corona per ans infurmar, schegea che tuts pre-



Il Chalandamarz 2020 è vegnì desditg quest onn en bleras vischnancas grischunas pervi dal virus da Corona. Uschia er ils cortegis ed il chant dals uffants tras la Val Müstair. In scolast ha publictà quest placat sin las medias socialas, agiuntond il commentari: «Sun fich trist. Ingün Chalandamarz!»

FOTO G. CONRAD

tendan che las medias fetschian mo polemica.

Gea, nus faschain sgnoccas ed avain a medem mument ina brava «fiffa». Sgnoccas e temas enina. Ed en tut quest turnigl empruvain nus da star cun ils pes sin terra e da responder la dumonda: Tge capita qua atgnamain?

Icapita ensasez quai ch'è gia ditg enconuscent: Noss mund n'è anc mai stà uschè grond e sviluppà ed a medem mument uschè pitschen e vulnerabel. Quai che capita da l'autra vart dal mund, quai capita a medem mument – u forsa cun dus, trais mais retard – era tar nus. Quai tuna banal e sarcastic, però quai è uschia.

Cler, nus pensain bain anc adina che noss mund grischun, svizzer u europeic saja salv e segir, gea perfin autentic e genuin, cun plumpas e gaischlas, cun chapitschas e blusas, cun chant e gibels. Ma a medem mument fotografain nus noss uffants e lur plumpas cun telefonins or da tocca producida en China. Ils stivalets dals uffants èn «made in Bangladesh» e la launa da las chapitschas cotschnas n'è betg da nursas grischunas. Noss Chalandamarz è gia oz pli chinai che «net e stget» grischun. Mo che nus ignorain quai gugent per amur

da noss maletgs prefigurads culturalmain. Maletgs impurtants, senza dubi. Però maletgs che ston vegnir redefinids, discutads, debatads ed adattads permanentamain. Sche nus restain fixads sin noss maletgs, alura perdain nus ord vista las realitads e ristgain da vegnir surprais fermamain, e nus na chapin betg pli il mund. Sco en quest cas dal virus da Corona.

E l'entschatta da l'istorgia? – Avant var dus mais nascha in tup virus (problamain) sin ina fiera da peschs e fritgs da mar en la metropola Wuhan en China. Dad animals vegn el surportà sin l'uman e quel transporta quest virus «made in China» sur il globus. E tut quai che nus avain empruvà da separar avant bainin bainin – nus da questa vart dal globus ed ils auters da tschella vart – quai vegn bittà trantergliauter. Però grazia al Chalandamarz annullà ans vegnin nus conscients dad esser forsa dappli «made in China» che quai che nus pensain. Nus essan part dal mund sco tut ils auters. E per dir la vardad n'è quai gnanc in patratg uschè mal, perquai ch'el gida a relatar, ad esser solidaric e da forsa gia ans preparar sin proximas surpraisas, ch'ellas sajan bellas u tristhas. Forsa ch'il virus da Corona è mo ina prova da quai che pudess er anc vegnir.